



*Minggu, 20 Pebruari 2022*  
**Ogen: Yesaya 41:9-10**



*Ku kawali janah Ku kellini kam*



**P**ernah nge si inem lau masin/air laut? Kalak si minem lau masin labo kepe erbahanca muasna e tertambari tapi ermuasna ka ia. Jadina la erpuas-puas erkiteken muas lalap. Anding-andingen enda pe nuriken geluh si la pernah ngatakan bias. La bias-bias piahna la ngasup ngatakan bujur sabap igejapkenna kurang lalap. Ipekeri me gegeh si lit segelah banci puas dungna biak sibagenda rupana peturah kebiaren. La teneng dengen la ngasup ngenanami ulih latih.

Renungenta kata persinget Jesaya man bangsa si sangana ngeluh bas tabanen. Ngeluh bas kebiaren, ketertekanan, mbue perbeben geluh, janah deba nggejapkan maka Dibata enggo nulak kegeluhenna. Alu kata sideban nggejapkan maka buena perbeben si jadi e erkiteken Dibata nulak ia dengen lanai engkelengi geluhna. Kata Dibata si isehken Jesaya enda mpetetap ukur bangsaNa, maka bangsa e suruh-suruhan Tuhan kap. Tuhan tetap ndilo ia aminna ia tading ndauh ras Tuhan, kai si enggo ipilihNa labo itulakNa. Dibata petetap ukurna alu ngatakan ola mbiar, Dibata ras ia kap. Dibata sinampati, si engkawali, si engkelengi dengen tetap erbahanca megegeh.

Kai ertina kata enda man banta? Ingetlah Tetap Dibata ras kita, kune paksa lit perbeben si mberat ola mbiar, ampeken kerina perbeben e, bahanlah e erbahanca kita ergegehna erpenungkunen man Dibata. Ertotolah. Toto e erbahanca kita ngasup natap perbeben e arah cara pandang kiniteken seh maka uga beratna pe perbeben e ngasup kita ndalanisa alu payo ras dem i bas ketenangan sabap si eteh maka kuasa Dibata ergegeh kap dengen pasti isehkenNa man banta. Malem pe ateta janah ipengasupNa kita tetap ngatakan bujur sabap kerina jadi cukup bas geluh enda. Mari dage o teman, ola sipenalem saja gegehta ngalaken perbeben e sabap e banci peturah perbeben-perbeben si mbaru.